

明

史

明史卷三百七十三

列傳二百二十四

滿桂孫祖壽趙率教

馬世龍

祖寬張任學

沈有容

賀虎臣

滿桂蒙古人幼入中國家宣府稍長勇敢便騎射每從征多斬敵軍全獲敵首一予一官否則資白金五十桂屢獲金不受職年及壯始為總旗會塞上無警居十餘年乃得一級為百戶後累遷潮河川守備楊錫四路師敗荐小將知兵者數人首及桂命移守黃土嶺為總督王象乾所知歷石塘路游擊喜峯口叅

將天啓二年大學士孫承宗行邊桂入謁承宗壯其
貌與語兵事大奇之及出鎮山海卽擢副總兵領中
軍事承宗幕下文武輻輳獨用桂桂推尊甚衆皆竊
笑之然忠勇絕倫持身廉無聲色好與士卒同甘苦
明年承宗議出關修侵寧遠問誰可守者馬世龍以
孫鍊對承宗不可荐李承先亦不可袁崇煥茅元儀
進曰滿桂可但爲公中軍不敢請耳承宗曰可安問
中軍呼桂語之慨然請行世龍猶以爲不可承宗不
聽卽置酒餞之桂至寧遠與崇煥協心經度屹然成
重鎮語具崇煥傳時蒙古部落多駐牧寧遠東鄙遠

民來歸者悉為所掠承宗欲勦之四年二月遣桂及
總兵尤世祿襲之大凌河諸部號泣西竄來都以寧
拱免軍費炒花諸部陽受款而陰反側桂善撫縱諸
部咸服歲省撫賞費不貲初城內外人跡蕭然至是
軍民五萬餘家屯種至五十里遠近莫不歸附其年
九月承宗顯暴其功請進秩履賞詔擢都督僉事加
銜總兵承宗乃令典後部與前部趙率教相將用與
蒙古戰乾糧圯新獲多督餉郎中楊呈秀尅餉副將
徐連激軍變圍崇煥署欲犯桂憚其家卒衆不敢乃
東走桂與崇煥追斬首惡撫餘衆而還六年正月我

大清以數萬騎來攻遠近大震桂與崇煥死守發大砲傷攻者圍解帝大喜立擢都督同知實授總兵官時

大清分兵攻薨筆島盡焚其積貯圍既解桂急率兵往救已無及輪功再加右都督歷世襲副千戶桂疏謝復自列前後功優詔褒答桂初與趙率教善每事推之是役也怒率教不親救相責望中朝聞之下勅戒諭至五月崇煥復言桂非但忠率教與臣及將卒皆不和自解圍後意氣彌張驕蹇護罵恐壞封疆大計乞移之別鎮以閑外事權歸率教奉朝皆知桂可

用而慮其同城敗事遂召還京方崇煥之發疏也督
師王之臣不與聞此聞馳至寧遠勸止之崇煥亦遣
使追桂而召命已下之臣力言桂不可去請用之閔
門崇煥又以為不可閔六月乃命以故秩僉書中軍
府事未幾崇煥亦自悔請仍用之臣言帝可之命桂
掛印移鎮關門兼統關外西路及燕河建昌諸軍賜
尚方劍七年五月

大清兵圍錦州分兵擊寧遠桂急遣兵往救被圍荒
蘿山桂與總兵尤世祿赴之大戰相當遂入寧遠城
與崇煥為守禦計俄

大清兵追薄城下桂率副將尤世威等出城迎頗有
殺傷桂親冒矢石身亦被創遂以却敵功加太子太
師世廕錦衣衾事及崇煥去王之臣再出督師盛推
桂才請仍鎮寧遠會蒙古炒花諸部離散桂與之臣
多收之麾下中朝聞而非之莊烈帝已嗣位錫之臣
毋蹈袁應泰王化貞故轍并責桂阿之臣意桂遂請
病乞休帝慰留之已而言官劾之臣多及桂之臣竟
罷桂亦召還府崇禎元年七月也適大同總兵梁家
楨失事以桂代之大同久恃款弛併揮部而侵順義
王遂入境大掠家楨及巡撫張翼明誅死揮部遂校

賈宋去桂至通歷八路七十二城堡大修守備軍民
恃以無恐明年正月

大清兵入近畿桂立帥五千騎入衛次順義興宣府
總兵侯世祿俱戰敗遂趨都城帝聞遣官慰勞犒萬
金令與世祿俱屯德勝門無何交戰世祿兵潰桂獨
前閉城上發大砲佐之候傷桂軍甚衆桂亦負傷帝
遣中官勞以羊酒令入休甕城旋與袁崇煥祖大壽
並召見桂解衣示創帝深嘉嘆拜賜而出十二月朔
復召見下崇煥獄賜桂酒饌令總理關寧諸軍營安
定門外桂曉勇敢戰所部降丁間擾民桂不能問副

將中府所統多市人桂軍凌之夜發矢驚其營有死者御史金聲以聞帝亦不問及大壽軍東濟事益急帝拜桂武經略蓋統入衛諸軍賜尚方劍趣出師桂言敵勁我寡未可輕戰中使趣之急不得已督黑雲龍麻登雲孫祖壽諸大將以十五日移營永定門外二里許列柵以待

大清兵方自良鄉回明日昧爽以精騎四面圍之諸將不能夫大敗桂及祖壽俱戰沒雲龍登雲被執帝聞震悼遣禮部侍郎徐光祚致祭贈少師世廕錦衣衾事襲陞三級賜祭葬有司建祠祖壽字必之昌平

人萬曆中舉武會試授固關把總天啓二年歷官署
都督僉事為薊鎮總兵官孫承宗行遣議于薊鎮三
協十二路分設三大將以江應詔領東協轄山海關
一片石燕河建昌四路駐關門以馬世龍領中協轄
馬蘭松棚喜峯太平四路駐三屯營以祖壽領西協
轄石匣古北曹天墻子四路駐遵化經略王在晉總
督王象乾言永平設鎮本以衛山海今移之三屯則
去山海四百里于應援為疎遵化去三屯止六十里
今並列兩鎮于建牙為贅請令世龍仍鎮永平以東
協四路分隸應詔世龍而以中西兩協完隸之祖壽

仍鎮三屯章下兵部署事侍郎張經世議如其言帝
再咨承宗承宗執如初帝可之祖壽遂移鎮遵化七
年錦州告警命赴援不敢戰兵罷被劾崇禎元年罷
歸都城被兵散家財招舊部曲赴闕竟決于陣贈卹
如制祖壽初守固關遘危疾妻張氏割臂以療絕飲
食者七日祖壽生而張氏斃死遂終身不近婦人為
大帥部將以五百金遺其子于家却不受他日來省
祖壽賜之酒曰却金一事善體我心否則將盡法于
汝其秉義執節如此

趙率教陝西人萬曆中歷官廷綏泰將屢著戰功已

被劫罷遣事急詔廢將舊家丁者赴軍前立功率教
受知于經畧袁應泰擢副總兵興中軍天啓元年遼
陽破率教棄應泰逃罪當死律免明年王化貞棄廣
寧遁關外諸城悉空率教請于經畧王在晉願收復
前屯衛城率家丁三十八人往蒙古據其地不敢前
抵中前所而止其年游擊魯之甲以樞輔孫承宗令
赦難民六十至前屯且驅蒙古于郊外率教乃入城
即編次難民為兵繕雉堞招流亡軍府漸立已而承
宗令裨將陳諫以川湖上兵未助其人頗勁悍前屯
守始固而所招流亡至五六萬擇其壯者從軍悉加

精練餘給牛種大興屯田身自督課至手足胼胝承
宗出關閱視大喜慰勞贈以己所乘輿且以語帝所
遣較事者時帝欲悉關外情形遣中使日隨軍奏報
故承宗語之蒙古虎墩兔素為總督王象乾所撫其
部下抽扣兒者善為盜率教來間斬其四人招撫食
事萬有孚與率教有隙遂以故敗歟事訴于象乾象
乾告兵部尚書董漢儒將斬之承宗貽書漢儒言其
故率教得不死時承宗分關內外為五部以馬世龍
王世欽尤世祿領中左右部而令率教與副將孫練
領前後部部各萬五千人率教仍駐前屯四年九月

恭宗以其功予朝權舉都督銓事加銜總兵五年冬
承宗去高舉恭代總督易置率教善事第第亦委
信之六年十月蒙酋以寧遠被圍來問入犯平川三
山堡率教破走之其袍中後所者又為副將楊應乾
所敗捷聞帝大喜立擢都督同知實授總兵官代楊
麒鎮山海關尋論功再進右都督世廕本衛副千戶
時滿桂守寧遠亦有盛名與率教深相得及寧遠被
兵率教令一都司四守併將兵東援桂怒其稽緩拒
不納以表崇煥言乃令入圍既解率教欲分功桂不
許且怒其不親援兩人遂有隙帝為下詔戒勉而桂

大興崇煥不和乃召還令率教盡統關內外兵移鎮寧遠七年正月

大清兵南征朝鮮率教督兵抵三岔河不敢進而止三月崇煥議修築錦州大凌河中左所三城漸圍恢復率教移鎮錦州獲工役帝念其勞特加左都督五月裁

大清來土工未畢大舉來攻率教與中官紀用副將左輔朱梅等憑城固守用大砲擊頗有死傷相持二十四日圍始解時桂亦獲功于寧遠因稱寧錦大捷魏忠賢等蒙重賞率教但加太子少傅廢錦衣世襲

千戶而忌者又抵其阨田啓募將罷之崇禎元年正月督師王之臣益其功乃命留任八月移鎮永平兼轄薊鎮八路踰月掛平遠將軍印再移至關門明年大清兵由大安口南下率敎急赴援三晝夜馳三百五十里抵三屯營總兵朱國彥不令入遂策馬而西十一月四日戰于遵化中流矢陣亡一軍皆沒帝聞痛悼賜恤興立祠奉祀率敎為將廉勇待士有恩勤身奉公勞而不懈與滿桂並稱良將二人既沒並無能辦束事者國彥以崇禎二年四月為薊鎮中協總兵官駐三屯營十一月七日

大清兵臨城副將朱來同等挈家潛遁國彥憤榜諸人姓名于通衢以所積俸銀五百餘及衣服器具盡給部卒冠帶西向稽首與妻張氏並投繯死

馬世龍字蒼元寧夏人由世職舉武會試歷宣府遊擊貌魁梧多臂力天啓二年孫承宗署兵部有荐其才者起授永平副總兵使過國陞見承宗與語奇之薦授署都督僉事克三屯營總兵官及承宗出鎮金山海總兵江應報定軍制應詔先受尚方劍權尊駭不任事承宗荐世龍代世領軍部調總兵王世欽克世祿分領南北二部明年正月以世龍權輕請賜尚

方利實授府銜且極言文臣監制之害帝可之承宗
乃築壘拜世龍火將代行授鉞禮軍馬錢穀悉屬之
尋定分地世龍居中駐衛臣世欽南海世祿北山並
受世龍節制兵各萬五千人世龍感承宗知顧盡力
承宗令茅元儀造戰車獨世龍解其意出已計盡改
爲車爲偏廂與承宗定計出守關外諸城規模漸定
四年巡撫俞安性偕世龍及袁崇煥東巡廣寧世龍
又與崇煥世欽航海抵蓋套相度形勢而還五防叙
勞加右都督當是時承宗統士馬十餘萬用將校數

百人歲費軍儲數百萬諸有求于承宗者率因世龍
不得則大怒而世龍貌偉中實怯忌承宗者多擊世
龍以撼之承宗抗辯于朝曰人謂其貪淫廢削臣敢
以百口保其必無帝以承宗故不問至五年九月世
龍部將敗沒于耀州鹽場攻者益衆耀州在三岔河
南有降人劉伯強者來言城內虛可襲取也且難民
數萬日夜望官軍至世龍信之遣前鋒副將曹之甲
叅將李承先率師往檄水軍游擊金冠以舟濟師冠
達金不至師次柳河得六漁艇以濟三日濟八百騎

世流渾中

大清守將出擊殺三將騎皆不返言官交章劾嚴旨切責令戴罪圖功魏忠賢方以清君側疑承宗其黨攻世龍者因并及承宗承宗不安其位而去以兵部尚書高第來代職方主事徐日爰者先佐第抗違事及從第贊畫力攻世龍世龍已陰結忠賢反削日爰籍其冬世龍亦謝病去崇禎元年王在晉為尚書世龍上疏極論其罪有詔逮世龍久不至在晉罷始詣獄二年冬都城戒嚴刑部尚書喬允升薦世龍才詔圖功自贖無何祖大壽師潰京師大震承宗再起督

師以便宜遣世龍撫諭馳至關大壽果聽命及滿桂戰
死遂令世龍代為總理賜尚方劍盡統諸鎮援軍三
年正月四日

大清兵拔永平八日拔遷安灤州及先所拔遵化皆
兵守之而分兵攻山海關世龍集諸將議曰敵方當
力于東大壽與相持我轉兵襲遵化進師三屯與大
壽剋期會戰使首尾不相顧庶諸城可復副將官惟
賢遊擊張奇化等八人慨然請行兵交惟賢奇化皆
敗死餘衆退保石門臺頭間頃之
大清兵攻馬蘭谷守將金日觀告急世龍遣叅將王

世選等援之城獲全二月世龍偵

大清兵將南下發遊擊曹文詔等扼玉田初八日遇
洪橋力戰

大清兵乃還三月世龍督文詔等戰大塹山轉關三十餘里漸近遵化城中出兵援乃引退錄先後功進左都督時四城失守已三月承宗大壽隔關門與世龍諸軍聲息斷帝急召四方兵勤王昌平尤世威薊鎮楊肇基保定曹鳴雷山海宋偉山西王國樞周原楊楊麒延綏吳自勉臨洮王承恩寧夏尤世祿周原楊嘉謨所將皆諸邊銳卒內地則山東河南南都湖廣

浙江江西福建四川諸軍亦先後至並壁荊門觀望
不進給事中張第元上言世龍在閩數載績效無聞
非若衛霍之傳功名足以服人也諸帥宿將非世龍
偏裨欲驅策節制誰能甘之師老財匱銳氣日銷延
及夏秋將有不可言者帝以世龍方規進取不納其
言時

大清兵所下城邑無意堅守大壽於五月十日薄濬
州明日世龍等以師會又明日復其城十三日游擊靳
國臣復遼安戎

大清守永平者亦旋師明日副將何可綱遂入永平

又二日別將復遵化關五月四城始復論功大壽最
世祿次之世龍加太子少保歷本衛世千戶是年八
月復謝病歸六年五月棟漢虎墩兔合套寇犯寧夏搃
兵賀虎臣戰沒詔起世龍代之世龍生長寧夏習其
形勢為天修戰備明年正月二部入犯遣泰將卜應
第邀擊大破之斬首二百有奇踰月套寇犯賀蘭山
世龍遣降丁潛入其營截其長撒兒甲斬級如前世
龍多收套衆巡按御史范復粹疑之言于朝有詔詰
責世龍言臣收降正以疑憚部也所收三百五十人
先後殺敵甚夥其形跡已携不足為慮帝許之未幾

棟部大舉入犯世龍遣副將姜光先等分五道伏要害而已中道待之夾擊斬首八百有奇巡撫王振奇亦斬三百餘級寇復犯河而玉泉宮世龍復邀斬五百餘其年七月犯棗園堡世龍又大敗之俘斬一千有奇軍令斬首百二十級為大捷告廟稱賀世龍半歲中屢奏捷威名震西塞然是時棟套二部勢弱故世龍易以見功也無何卒于官年止四十餘後論功贈太子太傅世錦衣僉事賜恤如制

祖寬遼東人少給事祖大壽家從軍有功累官寧遠叅將勇敢善戰部卒多塞外降人所向克捷崇禎五

年七月叛將李九成等圍萊州急詔發關外兵討之
寬與新國臣祖大弼張韜率兵抵昌邑巡撫朱大典
獲賊書約寬等為內應以示寬等皆誓滅賊以自明
乃用寬國臣為前鋒至沙河寬五百騎遇賊兵三千
引却會國臣至拔刀大呼直前寬大弼韜咸殊死戰
大敗賊兵逐北抵城下立解萊州圍韜降丁原名海
參代最號勇國臣善規陣嘗曰塞上交兵茶頃勝負
已分一切古法無所用是月晦進兵黃縣賊傾巢出
戰寬等復大敗之遂與劉澤清等築長圍以困登州
明年二月賊始平語詳大典傳寬以解圍功進都督

僉事再敘功世廕外衛副千戶進副總兵八年秋命
為援勅總兵官督關外兵三千討流賊十月至河南
巡撫陳必謙監紀推官湯開遠令與左良玉抵靈寶
至則挫張獻忠于焦村無何高迎祥李自成至與獻
忠合攻關鄉寬赴救賊解而趨靈寶斷良玉寬軍不
相應遂東陷陝州攻洛陽良玉寬至迎祥自成獻忠
皆走良玉追迎祥而寬分擊獻忠夜督副將祖克勇
等趨葛家莊黎明遇賊先登整齊王軍大潰奔嵩縣
九皋山寬伏二軍于山溝以誘之賊趨下伏發斬截
九百有奇尋與副將劉榮基羅岱遇賊汝州圯料鎮

獲大敗賊伏屍二十餘里斬馘千六百有奇獻忠憤
合迎祥自成兵與寬戰龍門白沙截官軍為二寬自
斷後士卒殊死鬪自晨迄夜分獲大捷斬馘一千有
奇迎祥自成乃走窺光州寬督副將李輔明躡賊後
與副使戴東昇合于信陽賊走攻碓山寬等馳救大
破之斬馘五百八十有奇自成等遂東走廬州攻圍
七晝夜明年正月寬等至賊奔全椒遂圍滁州南京
太僕卿李麓斯知州劉大鞏樂之賊死無算乃裸淫
村婦女數百斷其頭露下私為厭勝術城上發砲輒
炸或音不鳴麓斯等取園諭外鄉砲乃可用賊計窮

空營出掠而寬等諸軍至寬大呼諸軍無不一當百
自晨至晡賊大敗從城東五里追至閬山之朱龍橋
橫屍枕藉水為不流時總理盧象昇親督戰謂所殺
多良民懷款寬大愠牽象昇衣請往驗象昇謝乃已
二月又從象昇破賊七頂山殲自成精卒殆盡象昇
遂移軍南陽命寬偕鄧州會賊渡漢江入郢襄餘衆
三萬匿內鄉浙川山中象昇命寬與祖大樂等入山
搜討遣軍慙勇飲食嗜欲異他卒不可繩以法往時
官軍多閬中人與賊鄉里臨陣相勞苦拋生口棄糧
重即縱之去謂之打活仗遣軍不通言語逢賊即殺

故多勝然所過焚廬舍淫婦女恃功不戢又利野戰
憚搜山且見賊遠竄非旬朔可定自以為客將無持
久心寬卒方過河諱而逸象昇激勸再三始聽命至
黨子口仍按甲不動而總兵李重鎮素恒怯異卸責
衆並思歸象昇乃力陳入山搜勦之難請令寬重鎮
赴關中討賊會總督洪承疇亦請之寬等遂移軍陝
西隸承疇麾下八月京師被兵召入衛錄滁州功進
右都督齊銀幣事定詔赴寧遠協守十一年冬
大清兵入畿輔詔寬率師援及山東告急寬逗遛明
年正月濟南失守褫職被逮坐失陷藩封棄市寬敢

戰有功稱良將性剛使氣不為文吏所喜卒致大辟
莫為論救帝在位總兵官被殺者十有四人元年大
同梁家楨三年薊鎮張士顯山西張鴻功十年薊鎮
李國樞十二年薊鎮吳國俊陳國威李重鎮山東倪
寵及寬十四年河南王紹禹十五年大同王樸保定
楊德政陝西賀人龍十六年薊鎮薛敏忠諸人多處
死法獨寬之死人頗謂失刑云

張任學安丘人天啓五年進士授太原知縣以才調
榆次崇禎四年舉治行卓異入為御史陳蜀中私稅
催科訟獄三大苦帝為飭行出視兩浙鹽法數條奏

利獎八年流賊陷鳳陽巡按吳振纓被逮簡才望御史代之遂命任學往還朝復按河南監軍討賊時群盜縱橫而諸將縮朒不敢擊任學慨然曰事不難難臣職也賊勢如此戎革雍容坐鎮耶十一年二月遂上疏極詆諸將請易武階親執干戈為國平賊帝壯之下吏兵二部及都察院議諸臣以文吏無改武職者請仍以監軍御史兼總兵事帝不從命授署都督僉事為河南總兵官河南舊無總兵左良玉陳永福並以客兵併援勦至是大將特設而麾下無一官兵部乃以署鎮許定國兵授之使以叅將羅成為中軍

岱傑將屢著戰功任學僑以自強時熊文燦名王撫
劉國能張獻忠俱降羅汝才馬進忠李萬慶等踰中
原如故河南人據塢壁自保者數十賊悉摧破之踞
息縣光州礮人投汝水水為赤任學不能大創也進
忠勢衰佯求撫文燦及巡撫常道立許之來間逸去
事聞任學與文燦道立並錫秩七月任學督岱等赴
羅山合左良玉軍擊汝才萬慶及紫薇星順義王大
敗之追奔五十里斬首一千四百有奇獲黑虎狼滿
天星賊奔遂平九月進忠寇開封至瓦子坡岱奮擊
賊盡棄輜重遁入大隗山獲其妻子其冬京師戒嚴

任學入衛道謁文燦言獻忠狼子野心終為國患我
以勤王為名出其不意可立縛也文燦不能用抵畿
南有詔却還巡撫道立調良玉兵于陝州賊乘虛氏
虛遁入內鄉浙川為文燦所劾明年除道立名任學
亦錫一秩游擊朱懷智都司孔道興再破賊陳州部
將王應龍尤之龍等破賊襄城五戰皆勝副將岱興
應龍懷智等復破賊葉縣十日奏八捷帝詔所司核
實已又挫賊裕州而是時總兵孫應元黃得功統京
軍討賊屢奏大捷凱旋錄功任學亦叙復二秩尋與
左良玉陳洪範戚李萬慶于內鄉萬慶方降獻忠已

叛文燦盡調河南軍援勅獨任學留汝南川貴總督
李若星論文燦主撫之謬請復任學原官攝行大將
督察軍事不從七月獻忠令汝才自房縣西走岱偕
良玉追之良玉令岱為前鋒已隨其後至羅撲山軍
之食賊伏兵要害岱與副將劉元捷鼓勇直上伏四
起岱馬足絀于藤抽刀斷之蹶而復進乃棄馬步鬪
久之矢盡陷于賊良玉軍亦大敗事聞任學坐褫職
十五年言官請起廢任學與馬來及用而卒

沈有容字士弘宣城人僉事寵之孫也幼走馬擊刺
好兵畧舉萬曆七年武鄉試謁蒯遠總督梁夢龍用

為昌平千總以才受知總督張佳胤調薊鎮東路轄
南兵後營十二年秋朵顏長昂以三千騎犯劉家口
有容夜半率健卒二十九人迎擊身中二矢卒死七
人寇亦退斬首六級而還由是知名遼東巡撫顧養
謙召麾下保練火器十四年從李成梁出塞抵可可
母林新懺多明年再出亦有功成梁攻北關有容陷
陣馬再易再斃卒拔其城錄功世廕千戶遷都司僉
書守淳屠谷從宋應昌援朝鮮乞歸日本封事壞福
建巡撫金學曾欲用奇搗其穴特起有容守涪銅興
二十九年倭掠諸寨有容擊敗之踰月與銅山把總

張萬紀敗倭彭山洋倭據東番有容守石湖謀盡殲
之以二十一舟出海多沒于風過澎湖存十四舟與
倭遇格殺數人縱火沉其六舟斬首十五級奪還男
婦三百七十餘人倭遂去東番海上息肩者十年捷
聞文武將吏悉叙功有容賚白金而已西洋有紅毛
番者名荷蘭國克悍善戰三十二年七月其長韋麻
即駕三大艘至澎湖求互市稅使高案召之也有容
白當事自詣往諭見麻即論說鋒起麻即呼案使者
索還所賂來金揚帆去改僉書浙江都司由浙江遊
擊調天津遼溫處叅將罷歸四十四年福建中倭巡

撫黃承元請特設水師起有容統之襲禽倭東沙尋
招降巨寇袁進李忠散遣其衆泰昌元年連事棘始
設山東副總兵駐登州以命有容天啓改元連蒲相
繼覆熊廷弼建三方布置之議以陶胡先巡撫登萊
而擢有容中軍都督僉事充總兵官登萊遂為重鎮
八月毛文龍有鎮江之捷招有容統水師萬偕天津
水師直抵鎮江策應有容嘆曰率一旅之師當方張
之敵吾知其不克濟也無何鎮江果失水師遂不進
明年廣寧覆連民走避諸島日望登師救援胡先下
令敢渡一人者斬有容爭之立命數十艘往獲濟者

數萬人時金復蓋三衛俱空無人有欲據守金州者
有容言金州孤懸海外登州皮島俱遠隔大洋接
不及不可守迨文龍取金州未幾復失四年有容以
年老乞骸骨歸卒贈都督同知賜祭葬

賀虎臣保定人天啟中歷天津海防遊擊登萊叅將移
兗州六年遷延綏副總兵河套寇大舉入犯從主帥
楊肇基協擊大破之加署都督僉事崇禎二年陞州
平周大旺等作亂捕誅之尋擢總兵官鎮守寧夏関
中賊大起王嘉引陷清水營殺遊擊李顯宗遂陷府
谷其黨李老柴應之嘯聚三千餘人攻合水總督楊

鶴徽虎臣往討遇于盤谷俘馘六百有奇已擊斬虔
陽賊渠劉六四年神一元陷保安延安告急延綏撫
鎮甘肅援陝西巡撫練國事亟檄虎臣及副將李平
援虎臣等遂進圍保安已而杜文煥至謂城旦暮下
散遣他將兵賊遂引河套數千騎敗虎臣軍會張應
昌擊敗賊衆始棄城去虎臣偕文煥等先後獲首功
一千九百兵威甚振明年可天飛郝臨庵劉道江李
都司再圍合水虎臣偕臨洮曹文詔甘肅楊嘉謨固
原楊麒合擊大破賊甘泉之虎兕囚斬首七百有奇
賊大困六年五月揀漢虎墩兔合套寇五萬騎自清

水橫城分道入守傅姚之襲等不能禦沙井驛副將
史開先臨河堡叅將張問政岳家樓守備趙訪皆潰
逃寇遂進薄靈州虎臣急率千騎入守旋盡勒城中
兵出擊次大沙井寇從漢伯堡突至官軍未及布陳
且衆寡不敵遂戰死于攢挾五十騎突重圍出士卒
死者三千三百餘人傷者七百八十餘人事聞巡撫
耿好仁遽問遣戍贈虎臣都督僉事賜祭塋世廕指
揮僉事尋錄先後勦寇功再贈都督同知世廕錦衣
副千戶好仁亦免戍譔勇敢有父風既承廕尋舉武
進士積官至京營副將崇禎十七年三月李自成薄

京師京軍六大營分列城外皆不敢戰或棄甲降
獨率所部迎擊為賊射死弟誠身長七尺美鬚為
諸生以忠義自許兄誠襲副千戶早卒無子誠當襲
以讓其弟詮及賊陷保定家人勸易服遁叱曰吾忠
臣子偷生而逃何以見先將軍地下遂偕妻女投井
死

論曰將死官也無敵於前無君於後何身之足云滿
桂諸人仡仡行間雖未能大有所監建其死綏累年
之志並皎如也亦庶幾稱驍將矣

明史卷三百七十四

列傳二百二十五

曹文詔

艾萬年

張令

猛如虎

劉光祚

虎大威

劉國能

李萬慶

曹變蛟

曹文詔大同人勇毅有智畧從軍遼左歷事熊廷弼
孫承宗積功至遊擊崇禎二年冬初袁崇煥入衛京
師明年二月總理馬世龍昇所賜尚方劍令率叅將
王承引張叔嘉都司左良玉等伏玉田柘樹洪橋麇
戰有功遷叅將又從世龍等克大安城及鮎魚諸關
以與復四城功加都督僉事七月陝西賊熾擢延綏

東路副總兵賊渠王嘉引久據河曲四年四月文詔
克其城嘉引脫走轉掠至陽城南山文詔追及之其
下斬以降以功擢臨洮總兵官點燈子自陝入山西
文詔追之及於稷山諭降七百人點燈子遁尋被獲
伏誅李老柴獨行狼陷中部巡撫練國事延綏總兵
王承恩圍之五月慶陽賊郝臨庵劉道江援之會文
詔西旋與榆林叅政張福臻合勦賊老柴及其黨一
條龍餘黨奔摩雲谷副將張弘業遊擊李明輔戰死
文詔乃與遊擊左光先崔宗沓李國奇分勦綏德宜
君清澗米脂賊戰懷寧川黑泉峪綿湖峪封家溝皆

大捷掃地王授首紅軍友李都司杜三陽老柴者神
一魁餘黨也屯鎮原將犯平涼國事檄甘肅總兵楊
嘉謨副將王性善扼之賊走慶陽文詔從廊州間道
與嘉謨性善合五年三月大戰西濠斬千級生擒杜
三楊老柴餘黨糾他賊掠武安監陷華亭攻莊浪文
詔嘉謨至賊屯張麻村官軍掩擊賊走高山遊擊曹
變蛟馮舉劉成功平安等謀而上賊潰走變蛟者文
詔從子也會性善及甘肅副將李鴻嗣叅將莫與京
等至共擊敗之咸寧關又敗之關上嶺追至隴安嘉
謨變蛟夾擊復敗之賊餘衆數千欲走漢南爲遊擊

趙光遠所遇乃走張家川其逸出清水者副將蔣一陽遇之敗都司李宮用被執文詔乃縱反間結其黨殺紅軍友遂蹙敗之水落城追至靜寧州賊奔據唐毛山變蛟先登殄其衆可天飛却臨庵劉道江爲王承恩所敗退保鐵角城獨行狼李都司走與合可天飛劉道江遂圍合水文詔往救賊匿精銳以千騎逆戰誘抵南京伏大起城上人言曹將軍已沒文詔瞋目持矛左右突匹馬縈萬衆中諸軍望見夾擊賊大敗僵屍蔽野餘走銅川橋文詔率變蛟舉嘉謨及叅將方茂功等追及之大戰陷陣賊獲大敗尋與寧夏

總兵賀虎臣固原總兵楊麒破賊甘泉之虎兒四麒
復追賊安口河崇信塞白茅山皆大獲總督洪承疇
斬可天飛李都司於平涼降其將白廣恩餘賊分竄
文詔追擊之隴州平鳳間十月三戰三敗之遂蹙賊
耀州錐子山其黨殺獨行狼郝臨庵以降承疇戮四
百人餘散遣關中巨寇畧平巡按御史范復粹彙奏
首功凡三萬六千六百有奇文詔功第一嘉謨次之
承恩麒又次之文詔在陝西大小數十戰功最多承
疇不爲叙巡按御史吳姓推獎甚至復粹疏復上兵
部抑其功卒不叙當是時賊見陝兵盛多流入山西

其魁紫金梁混世王姬關鎖八大王曹操闖塌天興
加哈利七大部多者萬人少亦半之蹂躪汾州太原
平陽御史張宸極言賊自秦中來秦將曹文詔威名
宿著士民爲之謫曰軍中有一曹西賊聞之心膽摧
且嘗立功晉中而秦賊咸且盡宜敕令入晉協勦於
是命陝西山西諸將並受文詔節制六年正月抵霍
州敗賊汾河孟縣追及於壽陽巡撫許鼎臣遣謀士
張宰先大軍嘗賊賊驚潰六月文詔追擊之斬混世
王於碧霞村餘黨爲猛如虎逐走遇文詔兵方山復
敗五臺孟定襄壽陽賊盡平鼎臣命文詔軍平定備

太原東應昌軍汾州備太原西文詔連敗賊太谷范村榆社太原賊幾盡帝以文詔功多敕所過地多積粟糧以犒并敕文詔連平賊山西監視中官劉允中言文詔勦賊徐溝孟定寨所司不給米反以砲石傷士卒帝即下御史按問三月賊從河內上太行文詔大敗之澤州賊走潞安文詔至陽城遇賊不擊自沁水潛師還擊之斬首千餘四月賊屯潤城其他部陷平順殺知縣徐明揚文詔至賊走乃夜半襲潤城斬賊千五百紫金梁老回回自榆社走武鄉過天星走高澤山文詔皆擊敗他賊圍涉縣聞文詔破賊黎城

解去五月帝遣中官孫茂霖爲文詔內中軍賊犯沁
水文詔大敗之擒其魁大虎又敗之遼城毛嶺山西
賊既累敗乃避文詔鋒多流入河北帝乃命文詔移
師往討而賊已敗鄧玘兵於林縣文詔率五營軍夜
襲破之七月大敗懷慶賊擒其魁濱地龍又追斬老
回回于濟源文詔在洪洞時與里居御史劉令譽忤
及是令譽按河南而四川石砮土官馬鳳儀軍敗沒
於侯家莊賴文詔馳還賊甫解甲與令譽相見語復
相失文詔拂衣起面叱之令譽怒遂以鳳儀之敗爲
文詔罪部議文詔怙驕而驕乃調之大同七年七月

大清兵西征掃漠還師入大同境攻拔得勝堡叅將
李全自經遂攻圍懷仁縣及井坪堡應州文詔偕總
督張宗衡先駐懷仁固守八月圍解即移駐鎮城挑
戰敗還已而靈丘及他屯堡多失陷

大清兵亦旋十一月論罪文詔宗衡及巡撫胡沾恩
並充軍遼衛命甫下山西巡撫吳甦文詔知兵善
戰請用之晉中乃命爲援勦總兵官立功自贖當是
時河南禍尤劇帝已允兵部議敕文詔馳勦河南賊
甦復抗疏力爭請令先平晉賊後入豫帝不許而文
詔以甦有恩竟取道太原爲甦所留會賊高加計已

殲而鳳陽告陷遂整兵南以八年三月會總督洪承疇于信陽承疇大喜即令擊賊隨州文詔追斬賊三百八十有奇四月承疇次汝州以賊盡入關中議還顧根本分命諸將扼要害檄文詔入關文詔乃馳至靈寶謁承疇承疇以賊在商雒關官兵至必先走漢中而大軍由潼關入反在其後乃令文詔由閿鄉取山路至雒南商州直搗賊巢復從山陽鎮安洵陽馳入漢中遇其奔軼曰此行也道路回遠將軍甚勞苦吾集關中兵以待將軍拊其背而遣之文詔躍馬去五月五日抵商州賊去城三十里營火滿山文詔夜

半率從子叅將變蛟守備禹蛟都司白廣恩等敗賊
深林中追至金嶺川賊據險以千騎逆戰變蛟大呼
陷陣諸軍並進賊敗走變蛟勇冠三軍賊中聞大小
曹將軍名皆怖懼已而關王八大王諸賊犯鳳翔趨
汧陽隴州文詔自漢中馳赴賊盡向靜寧泰安清水
秦州間衆且二十萬承疇以文詔所部合張全昌張
外嘉軍止六千衆寡不敵告急於朝未得命六月官
軍遇賊亂馬川前鋒中軍劉弘烈被執俄副將艾萬
年柳國鎮復戰死文詔聞之瞋目大罵亟詣承疇請
行承疇喜曰非將軍不能滅此賊顧吾兵已分無可

策應者將軍行吾將由涇陽趨淳化爲後勁文詔乃以三千人自寧州進遇賊真寧之湫頭鎮變蛟先登斬首五百追三十里文詔率步兵繼之賊伏數萬騎合圍矢蝟集賊不知爲文詔也有小卒縛急大呼曰將軍救我賊中叛卒識之恭賊曰此曹總兵也賊喜圍益急文詔左右跳蕩手擊殺數十人轉鬪數里力不支拔刀自刎死遊擊平安以下死者二十餘人承疇聞拊膺大哭帝亦痛悼贈太子少保左都督賜祭塋世廕指揮僉事有司建祠春秋致祭文詔忠勇冠一時稱明季良將第一其死也賊中爲相慶第文耀

從兄征討數有功河曲之戰斬獲多後擊賊忻州戰死城下詔予贈恤從子變蛟自有傳

艾萬年米脂人由武學生從軍積功至神木叅將崇禎四年從曹文詔復河曲點燈子入山西萬年從文詔連敗之秦落鎮花地穴霧露山都司王世虎守備姚進忠戰死賊退屯石樓之康家山西拒河三十里綏德知州周士奇守備孫守法伏兵含峪渡河襲殺之五年從叅政樊一蘅討平不沾泥山西告警隸文詔東討與李單一月奏五捷又與賀人龍敗八大王掃地王兵明年賊將東遁連破之延家山亢義村賈

寨村擢副總兵初山西既中賊其土寇亦乘間起三
關王剛孝義通天柱臨縣王之臣皆殘破城邑後見
賊袁相繼歸順然陰結黨不散巡撫戴君恩新視事
謀誅之七年正月迎春召王剛宴殺之並殺通天柱
於他所而萬年亦捕殺王豹五與其黨領兵王生擒
翻山勦姬閼鎖掌世王獻俘京師晉中巨盜畧靖豹
五即之臣也有議君恩殺降者給事中張第元力言
諸賊蹂躪之慘請錄萬年功萬年適遘疾告歸尋加
署都督僉事八年二月上疏言臣伏劍從戎七載復
府谷解孤山圍救清水黃甫木瓜十一營堡轉戰高

山設伏河曲有馬鎮虎頭巖石臺山西川之捷戰平陽汾州太原復臨縣及疏亭驛大小數十戰精力盡耗與臣共事者李罕湊先朝露臣病勢淹淹猶力戰冀北又撫勦王剛豹五領兵王通天柱解散賊一萬三千有奇蒙恩許臣養病而督臣洪承疇檄又至臣不敢不力疾上道但念滅賊之法不外勦撫今勦俱未合機宜臣不得不極言夫勦賊不患賊多患賊走蓋疊嶂重巒皆其淵藪兵未至而賊先逃所以難滅其故則兵寡也當事非不知兵寡因糗糧不足爲苟且計日引月長以至於今雖多措餉多設兵而已不

可救矣。宜合計賊衆多寡，應用兵若干，餉若干，度其足用。然後審察地利，利用正用，奇用，伏用，間，或擊首尾，或衝左右，有不即時殄滅者，臣不信也。次則行堅壁清野之法，困賊於死地，然後可言撫蓋。羣賊携妻挈子，無城柵，無鎗重，暮楚朝秦，傳食中土，以剽掠爲生。誠令附近村屯移入城郭，儲精兵火器以待之。賊衣食易盡，生理一絕，鳥驚鼠竄，然後選精銳據要害以擊之。或體陛下好生之心，誅厥渠魁，宥其脅從，不傷仁，不損威，乃撫勦良策。帝深嘉之。下所司議行。然卒不能用其策也。尋授孤山副總兵，率所部戍平涼。當

是時總督洪承疇迫六月賊之期急進戰諸將見賊衆兵寡咸自揣不敵而勢不可止萬年及副將劉成功擲國鎮遊擊王錫命合兵三千以六月十四日至寧州之襄樂遇賊大戰斬首數百伏兵驟起圍之數重萬年國鎮力戰不支皆陣沒成功錫命負重傷歸士卒死者千餘人事聞贈恤如制

張令永寧宣撫司人天啓元年奢崇明反以令爲總兵從攻成都令雖爲賊用非其志崇明敗歸永寧令結宋武等乘間擒其僞丞相何若海率衆以降崇明怒殺令一家夷其先墓巡撫朱燮元言令等爲國忘

家請優擢示勸命與武並授叅將後屢從大軍征討
頻有功加副總兵仍視叅將事後實授建寧遊擊崇
禎中累遷副總兵鎮川北七年流賊入犯總兵張爾
奇以令為先鋒副將陳一龍武聲華為左右翼拒之
負山令追至龍潭一龍等不至面中三矢斬賊百餘
級而還已賊犯畧陽令又擊敗之扼保寧漢中諸要
害秦賊不敢犯十年冬李自成等陷四川三十餘州
縣總兵侯良柱陣亡令獲免楊嗣昌之督師也張獻
忠等悉奔興安為令所扼不得入漢中乃轉寇夔州
十三年二月大敗瑪瑙山走岔溪千江河令復與副

將方國安大破之。令時年七十餘馬上用五石弩中
必洞胸。軍中號神弩。將獻忠轉入柯家坪。其地亂峯
錯峙。箐深道險。令率衆追擊之。分其下為五鼓勇爭
利。賊衆官軍寡。國安爲後拒。他道逸去。令獨深入。被
圍居絕坂中。屢射賊營。應絃斃者甚衆。水遠士渴。賴
天雨以濟。圍終不解。襄陽監軍僉事張克儉言于總
督鄭崇儉曰。張令健將。奈何棄之急。令叅將張應元
汪之鳳從八台山進。總兵賀人龍從滿月嶺進。三月
八日。應元等先至。令方與賊圍呼聲動山谷。應元等
應之。內外夾擊。賊乃敗去。令與賊萬餘相持十三日。

所殺傷過當其卒僅五千耳時巡撫邵捷春駐重慶
遣守黃泥窪倚令及秦良玉為左右手後捷春移大
昌以令守竹園坪防賊逸九月獻忠兵大至令力戰
中矢死軍遂敗之鳳既解柯家坪圍後與應元同守
夔州之土地嶺部卒多新募獻忠盡銳來攻之鳳應
元力戰賊分兵從後山下突入其營應元突圍出之
鳳走他道免山行道渴飲斗水卧血凝臄而死踰月
令亦戰死軍中失二將為奪氣

猛如虎本塞外降人家榆林積功至遊擊崇禎五年
擊邢紅狼于高平解其圍明年敗賊壽陽黑山覆姬

關鎖軍已從曹文詔追賊西堰碧霞村斬混世王與
頗希收逐賊壽陽東又與陳國威馬杰破來遠寨從
文詔大破賊范村國威以步卒三百夜劫賊紅山嶺
如虎杰及虎大威和應詔擊殺九條龍尋以巡撫許
鼎臣命由文水入山勦賊又與大威應詔杰由隼落
山勦東犯之賊並有功賊流入畿南山西警漸息如
虎仍隸鼎臣七年勦賊沁源賊五條龍如虎驍果善
戰與虎大威齊名戴君恩異姓相繼為巡撫並委任
之以功進叅將其年冬賊在河南欲乘永北渡如虎
大威扼之河濱八年二月與大威國威斬劇賊高加

計山西賊盡平用駐薦加副總兵其冬以防河功加署都督僉事連歲防河及援勦河南賊勞績甚著十一年冬京師有警如虎督兵勤王明年四月擢薊鎮中協總兵官十三年坐事落職發邊方立功督師楊嗣昌請於朝令從入蜀十一月監軍萬元吉大饗將士於保寧以諸軍進止不一推如虎為正總統張應元副之率軍趨綿州分遣諸將屯要害而元吉自間道走射洪托蓬溪以待賊賊方屯安岳界偵官軍且至宵遁抵內江如虎簡驍騎追之元吉應元營安岳城下以扼其歸路十二月張獻忠陷瀘州其地三面

阻江惟立石站可北走元吉以賊居絕地將遣大兵
南搗其老巢而伏兵旁塞玉蟾寺蹙賊北竄永川逆
而擊之可盡殄永川知縣已先遁城中止丞簿一二
人如虎兇嚮道不可得夜宿西關空舍及抵立石賊
已先渡南溪返走閬中將賀人龍軍隔水不擊賊遂
越成都走漢川德陽渡綿河入巴州明年正月嗣昌
親統舟師下雲南檄諸將陸追賊諸軍乃盡躡賊後
賊折而東返歸路悉空不可復遏如虎所將止六百
騎餘皆左良玉部兵驕悍不可制所過肆焚掠惟叅
將劉士杰勇敢思立功諸軍從良玉多優閒不戰敗

隸如虎馳逐山谷風雪中咸怨望謹曰想殺我左鎮
跑殺我猛鎮時人龍兵已大譟西歸所恃止如虎元
吉深憂之賊自巴州至開縣官軍追之遇諸黃陵城
日晡雨作諸將疲之請詰朝戰士杰奮曰四旬逐賊
今始及之舍弗擊我不能也執戈先如虎激諸軍繼
之士杰所當輒摧陷獻忠登高望官軍見無後繼密
抽壯騎潛行箬谷中乘高大呼馳下良玉兵先潰士
杰及遊擊郭開如虎子先捷並戰死如虎率親兵力
戰部將挾上馬潰圍出旗纛軍符盡失乃收殘卒從
嗣昌下荊州及嗣昌死率所部托德安黃州會疽發

背不能戰退屯承天尋移駐南陽十一月李自成獲
傅宗龍兵乘勢來攻如虎與劉光祚憑城固守用計
殺賊精卒數千已而城破如虎持短兵巷戰大呼衝
擊血盈袍袖過唐府門北面叩頭謝上恩自稱力竭
爲賊擒死光祚及分守叅議艾毓初南陽知縣姚運
熙並死之唐王亦遇害光祚字鴻基榆林衛人初爲
諸生弃去承祖廕歷官廷綏遊擊崇禎三年奉詔勦
王與何可綱等戰灤州有功遷汾州叅將五年與遊
擊王尚義敗賊張有義於臨縣賊還兵犯之軍盡覆
光祚僅以身免被徵未行偕諸將復臨縣詔除其罪

六年賊犯石樓光祚分三道擊大敗之斬隔溝飛撲
天虎等六人獲首功三百七十已又數敗賊於臨縣
永寧撲天飛等詐降光祚設伏斬之七年勦敗王剛
餘黨斬四百餘級加署都督僉事爲山西副總兵敗
賊崞縣復其城八年賊渠賀宗漢號活地草者見其
黨劉浩然高加計破賊僞乞降光祚伏兵斬之晉中
群盜皆盡乃移光祚於宣府久之命率兵援勦河南
十一年連敗賊白菓園寨城已擢保定總兵官仍協
討河南賊其冬畿輔有警馳還鎮
大清兵薄保定以光祚堅守不攻而去光祚尋從總

督孫傳庭南下明年二月

大清兵還至渾河值水漲輜重難渡諸將王樸曹變蛟等相顧不敢擊光祚恒怯尤甚視師大學士劉宇亮劾之詔即軍前正法光祚適報武清捷宇亮乃繫之武清獄而拜疏請寬帝怒罷宇亮論光祚死十四年大學士范復粹錄囚力言光祚才武命充爲事官戴罪辦賊光祚舉廢將尤翟文等帝亦從之當是時賊已陷河南襄陽中原郡縣大抵殘破光祚士馬無幾督師丁啓睿尤怯光祚雖少有克捷而賊勢轉盛及傅宗龍敗沒於項城南陽震恐光祚適經其地唐

王邀與共守城陷遂死

虎大威榆林人本塞外降卒勇敢嫻將畧從軍有功累官山西叅將崇禎三年冬從總兵尤世祿擊王嘉引於河曲力戰被傷五年從總督張宗衡勦賊陵川潞安陽城沁水連勝之明年從巡撫許鼎臣擊賊介休殲其魁九條龍時賊去山西遁據輝林武涉山中約二萬餘鼎臣令曹文詔自黎城入大威猛如虎諸將自臯落山入賊屢敗尋移大威守平陽七年巡撫吳甦至察諸將中惟大虎如虎沉毅可屬兵事委任之其冬與如虎托賊渡河高加計據苛嵐四出剽掠

明年三月二將進至忻代山中加計馬上舞三十年
長挺突陣大威射殺之追斬其衆五百人餘黨悉平
姓薦二人忠勇進大威副總兵其冬以托責功加署
都督僉事九年八月畿輔被兵率師入援明年春命
援勦陝西賊遂代王忠爲山西總兵官上疏言諸將
討賊零級不可取生口不可貪封域不可限帝採納
之十一年詔兵部甄別諸大將大威以稱職增秩其
年冬京師戒嚴命總督盧象昇統大威及宣府總兵
楊國柱大同總兵王樸入衛尋從象昇轉戰至鉅鹿
賈庄被圍數匝象昇死焉大威等潰圍出督師劉宇

亮總督孫傳庭皆言大威國柱勇敢身入重圍視他將異乞令立功自贖大威亦上章請罪帝不從卒解其任尋令從軍辦賊十四年正月李自成圍開封總督楊文岳遣大威及副將張德昌先率五千人渡河會賊已解圍去乃會河南巡撫李仙風於偃師以兵少未敢擊賊待文岳軍至與賊戰鳴皋天破之又與監軍道任棟挫賊平峪七月自成及張獻忠羅汝才攻鄧州大威從文岳擊破之斬首千餘級陝西總督傅宗龍出關討賊文岳大威會之九月次新蔡抵孟家庄將戰秦師賀人龍軍先潰大威軍亦潰遂奔沈

丘賊連陷南陽鄧許再圍開封大威從文岳援之賊引去明年二月師次郾城督師丁啓睿總兵左良玉方與賊鏖戰文岳督大威及馮大棟張鵬翼等合擊賊大敗相持十一晝夜俘斬數千賊遂東陷陳州歸德已復圍開封七月朔啓睿文岳大威及良玉揚德政方國安之師畢會啓睿欲急擊良玉不從先走大威諸軍亦走帝大怒立誅德政黜譴啓睿諸人大威時奔汝寧出攻賊寨中砲死乃免其罪大威爲偏裨最有聲及爲大帥值賊勢益張所將止數千人不能大有所挫然身經數十戰卒死王事論者賢之

劉國能延安人始與李自成張獻忠輩同爲盜自號
闖塌天崇禎三年大亂陝西已渡河而東寇山西轉
掠畿南河北六年冬入河南遂由內鄉淅川犯湖廣
鄖襄破數縣明年正月入四川陷夔州折而東入鄖
陽境爲總督陳奇瑜所蹙走漢南同困車箱峽已得
出復大亂陝西再入河南躡江北官軍逼之與整齊
王屯商雒山間九年復偕闖王蝎子塊等由鄖襄趨
興安漢中總督洪承疇奔命不暇尋南走荆襄與總
兵秦翼明數戰其冬與蝎子塊等十七營窺潼關巡
撫孫傳庭扼之引而南明年闖馬光玉等將犯斷黃

率衆會之直趨江北官軍數道邀擊乃不敢東還走
黃陂入木蘭山轉寇河南敗叅將李春貴兵將迫開
封詔諸將發兵援乃南走黃麻當是時總理熊文燦
新至賊憚之見其下招降令頗有欲歸正者國能先
與張獻忠有隙慮爲所并後又與左良玉戰敗乃以
十一年正月四日率先就撫於隨州頓首文燦前曰
愚民陷不義且十載賴公瀚洗更生願悉衆入軍籍
身隸麾下盡死力文燦大喜慰撫之署爲守備令隸
良玉軍國能受約束無異志已而張獻忠罷汝才亦
降皆捷邑自固獨國能從軍征勦數有功明年二月

從良王勸王有詔還討賊獎勵之命兵部授官錄其部下將士曰獻忠能立功視此遂授國能副總兵四月良王會師南陽擊萬慶國能分擊賊潰奔遂招萬慶降其秋獻忠汝才並反文燦遣國能率萬慶兵會討遂並守鄭陽既而李自成擾河南復移守葉縣初國能爲盜時與自成汝才輩結爲兄弟及國能歸正自成輩深恨之十四年九月圍其城四面力攻國能不能支城遂陷被執賊猶好謂之曰若我故人也何不降國能瞋目罵曰我初與若同爲賊今則王臣也何故降賊遂殺之事聞贈左都督特進榮祿大夫建

祠萬慶延安人崇禎初與張獻忠羅汝才等並反賊中所稱射塌天者是也起陝西蔓山西畿南河北渡河殘河南出沒湖廣四川還趨鄖陽入興安困於車箱峽出險益大肆八年春賊七十二營會滎陽議分兵隨所向令萬慶及許可變助馬進忠橫天王西當陝兵已而諸路之賊盡萃於陝總督洪承疇彌歲不能定益恣出沒於河南湖廣九十五家迨十一年春國能獻忠降萬慶等大譟而去改稱十三家勢頗衰而文燦擁兵德安不敢擊萬慶等復大振李自成向關中萬慶及馬光玉馬進忠羅汝才惠登相賀一龍

蘭養成順天王順義王九家最著八月進忠光玉大
挫於潼關九月鄖襄賊又大敗於雙溝汝才率九營
走均州萬慶率三營走光固十一月汝才亦降自成
又大敗關內勢益衰惟萬慶光玉一龍順天王最勁
而萬慶得馬士秀杜應金所刼左良玉賄富且強營
麻城徙信陽十二年正月戰敗徙應山德安會光玉
進忠等皆大敗進忠懼而降而順天王已死一龍養
成伏深山登相遠掠秦蜀萬慶勢益孤文燦檄良玉
擊之唐縣姚梁分三營肆賊逐入三山裨得王修政
趨利戰死文燦收二營卒令良玉覺之內鄉萬慶等

在赤眉城四平岡依山結壘請降良玉慮其詐謀之
文燦益調諸將陳永福羅公金聲桓之兵會於賈宋
大勦萬慶及光玉可變副將國能亦至由張家林七
里河分擊賊大奔良玉遣國能以二十騎往偵且諭
萬慶降萬慶馳見輸情國能遂執許州叛黨于汝虎
以降處內鄉城下者四千人士秀應金見進忠萬慶
降而懼復來歸有劉喜才者夜取順義王首以獻餘
黨推可變爲主與胡可受皆降自是群盜大衰至五
月獻忠復叛汝才率其黨九營應之復大熾而萬慶
進忠以徒衆既散無二心萬慶願從征自効比國能

給餉遂授爲副總兵與國能守鄖陽獻忠等方大亂
蜀中鄖境得無事十四年獻忠突陷襄陽鄖守如故
明年正月總督汪喬年討賊以萬慶從至襄城軍潰
入城賊攻圍之固守五日城陷喬年死萬慶亦不屈
死事聞贈都督同知榮祿大夫立祠襄城奉祀

曹變蛟文詔從子也幼從文詔以功歷官遊擊崇禎
四年從復河曲明年連破紅軍友等於張麻村隴安
水落城唐毛山又破劉道江等於銅川橋勇冠諸軍
以御史吳姓薦進叅將文詔移山西變蛟從戰輒勝
及文詔改鎮大同山西巡撫許鼎臣言晉賊紫金梁

雖死老回回遇天星大天王蝎子塊闕塌天諸渠未
滅變蛟驍勇絕人麾下健兒千百才乃文詔亞乞留
之晉中從之七年賊悉入湖廣命變蛟南征文詔困
大同又命北援七月遇

大清兵廣武力戰守備黃國棟陣亡事定言官劾其
冒功帝不問其冬文詔誦成變蛟亦以疾歸明年文
詔起討陝西賊變蛟以故官從大捷金領川麇湫頭
鎮皆爲軍鋒文詔既沒變蛟收潰卒復成一軍總督
洪承疇薦爲副總兵置麾下與高杰破賊關山鎮追
奔三十餘里又與副將尤翟文遊擊孫守法追關王

高迎祥與戰鳳翔官亭斬首七百餘級又與總兵左
光先擊敗迎祥乾州迎祥中矢走斬首三百五十餘
級已而迎祥自華陰南絕大嶺夜出朱陽關光先戰
失利賴變蛟陷陣乃獲全九年破閩將澄城偕光先
等追至靖虜衛轉戰安定會寧抵靜寧固寧賊屢挫
其秋追混天星等擊敗之蒲城賊西走平涼鞏昌復
追破之十年二月巡撫孫傳庭部卒許忠友勾賊混
十萬謀犯西安變蛟光先方西追遇天星聞亂返賊
遂遁是時高迎祥已誅其黨閩將混天星遇天星踞
洮岷階文深谷間承嘯遣變蛟光先及祖大弼孫顯

祖合擊四月望入山遇賊郭家壩大雨諸將力戰賊
死傷無算食盡引還帝以賊久未平下詔切責九月
階州陷與光先並停俸俄擢都督僉事爲臨洮總兵
官當是時承疇及孫傳庭共矢滅賊傳庭戰於東承
疇戰於西東賊幾盡賊在西者復由階成出西和禮
縣光先顯祖皆無功獨變蛟降小紅狼餘賊復走竄
徽州兩當成鳳間不敢大逞西安鳳翔平涼諸郡差
得安十月賊關蜀中虛陷寧羗州分三道連陷三十
餘州縣承疇率變蛟等由沔縣歷寧羗過七盤朝天
二關山高道隘士馬疲困歲暮抵廣元賊已復還秦

變蛟等還軍邀擊斬首五百餘級時熊文燦督師中原兵部尚書楊嗣昌克三月平賊十一年四月朔以減賊踰期普議降罰變蛟光先並鎬五官戴罪辦賊賊之再入秦也其渠魁號六隊者與大天王混天王爭管王四部連營東犯混天星過天星二部仍伏階文獨闕將李自成以三月自洮州出番地承疇令變蛟偕賀人龍追之連戰斬首六千七百有奇番地無食賊多死亡變蛟轉戰千餘里不解甲者二十七晝夜賊止餘男婦三千潰入塞大弼駐洮州托戰不力賊遂復入岷州及西和禮縣山中變蛟還勦賊數入

山不敢出惟六隊勢張甚光先將討之六月自固原
進賊已奔隴州清水光先追至秦州六隊及爭管王
復走成縣階州爲變蛟所扼其別部號三隊及仁義
王混天王合竄寧遠亦入禮縣山中光先張疑兵馬
塢而疾馳挑坪掩擊俘斬三百二十扼其走路三賊
皆降自成六隊及其黨祁總管避秦兵復謀犯蜀副
將馬科賀人龍拒之將還走階文及西鄉憚變蛟乃
走漢中又爲光先所扼六隊祁總管皆降惟自成東
遁承疇令變蛟窮追而設三覆於潼關南原變蛟追
及大呼斫賊賊奔入伏中大敗死者相枕藉村民用

大棒擊逃者自成妻女盡失僅從七人竄餘皆降當
是時孫傳庭已盡滅延慶諸賊於是關中賊盡平錄
功進變蛟左都督十一月京師戒嚴召承疇入衛變
蛟及光先從之明年二月抵近畿帝遣使迎勞將士
皆有賜未幾戰渾河無功再戰太平路稍有斬獲及
解嚴留屯遵化麾下卒皆秦壯士思歸多逃亡諸將
追斬之乃定時張獻忠羅汝才既降復反陝西再用
兵總督鄭崇儉請變蛟軍西還帝不許旋用爲東協
總兵官十三年五月錦州告警從總督承疇出關駐
寧遠七月與援勦總兵左光先山海總兵馬科寧遠

總兵吳三桂遼東總兵劉肇基遇

大清兵黃土臺及松山杏山互有殺傷十二月承疇以

大清兵退屯義州議遣變蛟光先科入關養銳留三桂肇基於松杏間佯示進兵狀又請解肇基任代以王廷臣遣光先西歸代以白廣恩部議咸從之而請調旁近邊軍合關內外見卒十五萬人備戰守用承疇言師行糧從必芻糧足支一歲然後可議蓋兵帝然之敕所司速發命宣府總兵楊國柱大同總兵王樸密雲總兵唐通各揀精兵赴援以十四年三月偕

變蛟廣恩科先後出關合三桂廷臣凡八大將兵十
三萬馬四萬並駐寧遠承疇主持重而朝議以兵多
餉艱職方郎張若麒趣戰承疇念祖大壽被圍久議
急救錦州七月二十八日諸軍次松山營西北岡數
戰圍不解八月國柱戰沒以山西總兵李輔明代之
承疇命變蛟營松山北乳峯山而列七營兩山間環
以長壕俄開我

太宗皇帝親臨督陣大懼及出戰又數敗諸將遂謀
潛遁二十一日初更撲先走通科三桂廣恩輔明亦
走自杏山迤南沿海東至塔山爲

大清兵邀擊渤海死者無筭餘悉被戮惟三桂撲奔
入杏山變蛟聞敗急入松山與承疇固守居數日三
桂撲欲自杏山走寧遠至高橋遇伏大敗僅以身免
先後喪士卒凡五萬三千七百餘人自是錦州圍益
急而松山亦被圍應援絕九月二十三日承疇變蛟
等盡出城中馬步兵欲突圍出敗還守半年至明年
二月副將夏成德爲內應松山遂破承疇變蛟廷臣
及巡撫丘民仰故總兵祖大樂兵備道張斗姚恭王
之禎副將江翥饒勲朱文德等十人叅遊以下百餘
人被執皆殺之獨承疇大樂獲免文德義州衛人後

家錦州崇禎時積戰功至松山副將忤監視中官高
起潛爲所中斥罷十一年起故官及城被圍文德領
前鋒拒守甚力城破竟死二月大壽亦以錦州降杏
山塔山相繼失京師震懼詔賜諸臣祭葬有司建祠
變蛟妻高氏以贈廕請乃贈榮祿大夫太子少保世
廕錦衣指揮僉事法司會鞠樸罪御史却晉言六鎮
罪同皆宜死而三桂實遼左主將不戰而逃奈何反
加提督兵部尚書陳新甲覆議請獨斬樸勒科軍令
狀再失機即斬三桂失松錦杏塔宜斬念守寧遠功
與廣恩輔明通皆貶秩充爲事官輔明遼東人繁官

副總兵崇禎八年從祖寬南伐連破賊嵩縣汝州確
山明年追破賊滁州加都督僉事十二年擢山西總
兵官被劾罷承疇出關使從征既而代國柱遂敗十
六年冬

大清兵薄寧遠輔明赴救軍敗猶力戰沒於陣事聞
贈特進榮祿大夫左都督世廕錦衣副千戶賜祭葬
列壇前屯祀之撲榆林衛人父威萬曆中爲延綏副
總兵以禦套寇功擢署都督僉事爲總兵官殺降冒
功被劾罷起延綏西路副總兵已復總兵官鎮故地
屢敗套寇火落赤沙計擺言太先後獲首功二百五

十宣捷告廟進威都督同知世襲千戶三十六年代
杜松鎮遼東拱免黃台吉掠破長定等五堡殺掠千
五百餘人爲御史熊廷弼所劾斥罷尋起故官鎮大
同以守邊功進右都督改鎮薊州天啓元年遼陽破
詔昌平達其勦保定郭增輝宣府王國樞三總兵馳
援廣寧以威爲提督抵廣寧數月引疾去久之復爲
薊鎮總兵被劾罷任崇禎二年冬京師戒嚴命守宣
府護陵京尋入衛改薊鎮西協總兵官明年正月命
援兵後至者悉聽威調度俄命提督團練營出討朵
顏東不的搆其巢大獲進太岳太保左都督世蔭錦

衣千戶四年劾罷尋起故官鎮保定巡撫丁魁楚劾其老耄朕削復罷去七年被薦以老辭延綏總兵余冲霄戰沒起威故秩鎮之居四年卒威爲將五十年九佩將印子弟羣從咸爲大帥長子世欽里居殉節事具尤世威傳中撲世欽弟由父廕累遷京營副將崇禎六年賊殲畿南命撲與倪罷爲總兵官將京軍六千監以中官楊應朝廬九德賜弓矢千五百戰馬三百屢有新獲功罷加太子太保撲進右都督並廕錦衣百戶明年代曹文詔爲大同總兵官尋進左都督九年秋京師被兵詔撲入衛與保定總兵董用文

並賚蟒衣彩帶竟無功十一年加太子太保其冬畿
輔被兵從總督盧象昇入援方戰樂城東鹿趙州間
或言大同有警撲輒引兵歸十三年冬詔撲馳出關
救錦州明年八月撲首逆下詔獄十五年五月伏誅
傳首九邊科起偏裨至大帥戰功亞變蛟與三桂同
守寧遠有功十六年春督兵入衛賜宴武英殿命從
大學士吳姓南伐已而不行明年三月命從李建泰
西征李自成兵至科遂降封懷仁伯廣恩初從混天
猴爲盜既降屢立戰功既敗歸代科鎮山海關是年
十一月京師戒嚴廣恩入衛帝喜賚銀幣羊酒俄戰

龍王口薄有斬獲以捷聞總督趙光祚言援師至者
薊州三鎮廣恩及薛敏忠鍾鳴高也宣密二鎮張登
科唐通也五鎮中廣恩尤智勇請加提督銜統制諸
帥部議格不行帝惡廣恩觀望嚴旨譴責而冀其後
效特命叙功明年四月合八鎮兵大戰螺山敗績光
忤密請帝召入賜之宴用爲武經畧廣恩以帝頻戮
大將已又多過懼不敢至假索餉名頓真定久之大
學士姓將南征密請帝嚴旨逮治而已力救率之勅
寇廣恩感甚未數日帝遣中官賚二萬金犒其軍且
諭以溫旨廣恩遂驕不爲姓用大掠臨洺關徑歸關

中帝不得已命諫督師孫傳廷辦賊十月郊縣師覆
加廣思蕩寇將軍俾緣道收潰卒以保潼關未幾潼
關亦敗廣思西奔固原自成遣將追及之即開門降
自成大喜握手共飯封桃源伯通口辨無勇畧既敗
歸仍鎮密雲其年冬都城被兵奉詔入衛命守禦三
河平谷畏縮被責及

大清兵下山東通尾而南抵青州迄不敢一戰明年
復尾而北戰螺山又潰敗己命從姓南征姓未行而
斥乃令通轄薊鎮西協五月汰密雲總兵官命兼轄
中協四路已用孔希貴于西協而命通專轄中協十

月關外有警命率師赴援以氣牌二百爲賞功用事
定復移鎮四協帝顧通厚嘗賜以鱗衣玉帶玉盃金
簪召見喜其言論賜之宴并賜金爵紅錦諸物獎勞
備至稱卿不名故事大帥無稱卿者舉朝詫爲異事
明年賊逼宣府命移守居庸封定西伯無何賊犯關
即偕中官杜之秩迎降京師遂陷左光先裒將也與
流賊角陝西功最多自遼左還廢不用後聞廣恩
降賊亦詣賊降又有陳永福者屢破流賊於河南及
自成陷山西令廣恩諭之降永福曰汴梁之戰永福
親集矢於王目今窮而歸命懼不全自成曰人各爲

主何傷折箭以示信永福乃降封爲文水伯後自成
敗還山西永福爲守太原殺晉府宗室殆盡

論曰明事雖壞其間效死疆場者不謂無人惜乎中
朝御將之道則全未之講也如二曹勇畧冠軍郎西
寇不足平矣乃功成不賞又從而摧抑之自非赤心
亦鮮不解體矣及受命於危急刻期督戰則又皆裸
腹空拳委身白刃是明明以將予敵奈何猶望其得
當以報國乎明室其亡誠不待龜卜而決者矣